

# «КНИГА - МЫЙЫН КУАНЕМ»

Кокласола книгагудыш лудшо-влак чўчкыдынак коштыт. Шукыжым тышке йоча-влак вашкат. Книгагудышто тўрлў онгай мероприятий-влак эрта-ралтыт. Но библиотекеш чыла лудшыжак толын ок сене. Тыгай годым библиотекарь мўндыр яллашке шке лудшыжо деке вашка. Икече мый Никольский почингашке миен коштым. Тушто пеш шукертсе-как книгам лудаш йўратыше поро ковай ила.



Р.И.Николаева

Николаева Римма Ивановна 1935 ийыште кылме тылзын 26-шо кечынже Нўрепсолоште шочын. Шымше класс марте Изнур шко-льшто шинчымашым поген, вара Весшўргў кандашиаш школым тунем пытарен. Умбакеже Куженер районысо Тумнымучаш селаште трахестралан Трахомотозный дис-пансерыште тунемын. Курсым отличий дене тунем пытарен.

Йоча годсо жапшым шарналташ йўсў гынат, тиде жапым моды-юарлен коштмо манеш. А тиде пагытше Кугу сар жаплан логалын, ачажат сарыште вуйжым пыштен. Сар жапыште шочын-кушшо тулык икшывылан шуко неле-йўсым чыташыже логалын. Изи лийын гынат, неле пашам ятыр ышташыже пернен. Ава пелен кок изи ўдыр кушкын. Пеле шужен шинчyme пагытым шинчавўд деч посна шар-налтенат огеш керт. Шўйшў парен-ге, урвоч, писте кичке, арымшудо мыняр-гынат йўреныт. «Кампетке

тамжым палымат огыл», - ойла Римма Ивановна.

Трахестралан тудо Морко посёл-кышто ыштен. Тиде жапыште тра-хома чер пеш шарлен улмаш. Садлан самырык ўдырым район мучко черым тўрлаташ колтеныт. Тыге Римма Ивановна Никольский почингаште шке пўрымашыжым муэш. Виталий Николаевич Николаев (Милай Вичук) дене ешым погеныт. Кум икшывым ыштеныт. Р.Николаева Марий Кужер, Ерўмбал, Ердўр яллаштат тыршен. Тыгак тудлан район мучко ен-влакын шинча давленийыштым

висен кошташыже логалын. Пашаже куштылгыжак лийын огыл. Самырык ешым ойго авалтымеке, Римма Ивановна кум икшывыж дене пелаш деч посна тулыкеш кодеш. Ираида, Вячеслав да Эдуардым тудо шкетак йолўмбаке шогалтен, туныктен луктын.

Шке жапыштыже Р.Николаева ялысе депутатат, калык заседателят лийын. Кызыт шкетын кодын гынат, йочаже-влак, уныкаже-шамыч керт-мышт семын эре толын шогат.

Римма Ивановна 88 ийым темен гынат, кызытат книгам лудеш. Марий литературлан изинек

шўмангынам манеш. Шуко марий писатель-влакын произведений-ыштым уэш-пачаш лудеш. «Морко мланде», «Кугарня», «Марий Эл» газет-влакым эреак шергалеш.

«Поснак Леонид Яндаковын кни-гаже-влакым лудаш йўратем, ондакысе илыш нерген пеш шуко пален налын кертат», - шыргыжеш ковай.

Газет лаштыклаште Римма Ивановна Муналмаш Вачийын, Лев Сошины, Сергей Карповын ста-тьяштым куанен лудеш.

«Книгам лудмо деч посна ик кечат илен ом керт, тиде мыйын куанем», - манеш Римма Ивановна. Книгам кызытат шинчалык деч посна лудеш. Тыгак кенез жапыште пўртўс лонгашке лектын коштеш, тўрлў саскам, понтым поген, тель-лан шапашла. Яра жапым арам огеш эртаге, кидпашаланат жапым муэш. Тудо тўрлў кўвар шартышым, носким пидеш. Тыгак Римма Ивановна Ильинский почингаште илыше ўдыржо, Ираида Витальевна, аваже семынак книгам йўратыше кушкын, марий литературлан шўмангын. Кужу теле касым пайда-лын эртараш манын, эреак книгам лудеш. Нунын дене шогал мутланет гын, лывырге марий йылме дене кутырымышт книгам лудын шогы-мышт нерген вигак палдара. Нине лудшо-влак Кокласола книгагудо вуйлатышын книга дене толмыжым эреак вучат.

**А.БОГОЛЮБОВА,**  
Кокласола книгагудын  
вуйлатышыже